

陝西通志



第四十八卷

帝系一

皇帝

太子

后妃

DS
793
84555-
1735
v. 48

陝西通志四十八卷

帝系一 帝王 后妃 太子 諸王 宗室

粵若稽古周秦漢唐維耀鬼寶照灼秦疆廼立廟社廼啟明堂克
艱締造紹衣罔康關雎化始龍釐德涼瓜繇椒衍戚畹輝煌聖狂
異軌淑慝偕彰永垂法戒地以天長作帝系志第二十三

帝王

古今都會惟關中最先黃農以上弗可深考周家風號至治
漢唐亦稱一代之盛第泛覽諸本紀則美不勝書茲特以歷
代建都為經帝系為緯自史
臣論贊而外不衍一辭云

上古

五龍氏

五龍是謂五姓治在五方司五類布山岳蓋龍德而正中者也

史路

中三今上郡奢延膚施縣有五龍山蓋其出治之所故漢宣帝立

五龍僊人祠於膚施

注本

雲陽氏

雲陽氏作是爲陽帝厥化混混厥生濛濛都於雍之甘泉循蜚紀甘

泉山本亦曰雲陽在馮翊雲陽縣雲陽氏之嘗居路史注

有巢氏

有巢氏駕六龍從日月是曰古皇龜龍効圖書畀於是文成而天

下治其爲政也授而弗惡予而弗取天下之民皈仁居於彊及盤

嶺

路史禪通紀

盤嶺在長安三秦記云長安城有平原數百里無山川

湖水民尚井汲巢居地多井深者五十丈今興平始平原也本注

陰康氏

陰康氏之時陰凝而易閔人旣鬱於內腠理滯著而多重脰得所

以利其關節者制爲之舞教人引舞以利導之是謂大舞治於華

原

路史禪通紀○按華原即今耀州

女皇氏

女皇氏太昊氏之女弟少佐太昊正姓氏職婚姻通行媒以重萬民之判是曰神媒太昊氏衰共工作亂於是滅共工氏而遷之治於中皇山之原繼興於麗路史禪通紀山在金之平利上有女媧廟與伏羲山接伏羲山在西城女媧山在平利長安志云驪山有女媧治處又云藍田谷次北有女媧氏谷三皇舊居之所即驪山也本注

有熊氏

有熊氏小典氏之子王承填而土行色尚黃天下號之黃帝身五十二戰而天下大服乃達四面廣能賢稽功務法秉數乘剛而都於陳路史疏今寶雞故陳倉姚睦云黃帝都陳倉非宛邱故今隴右黃帝遺迹甚多本注

少昊氏

少昊青陽氏以處雲陽亦曰雲陽氏以金寶歷色尚白又曰金天氏處於甘泉興郊禪崇五祀正都邑輦車牛作布貨以制國用立

史官尊者老修其方而天下治

路史疏仡紀○按以上諸帝世次荒遠莫考其都雍與否祇因古史

所傳以作是編之外史爾

姓姬氏

武王諱發以歲己卯春二月克商即天子位定都鎬在位七年

王來自商至于豐乃偃武修文歸馬于華山之陽放牛于桃林之

野示天下弗服列爵惟五分土惟三建官惟賢位事惟能重民五

教惟食喪祭惇信明義崇德報功垂拱而天下治

周書武成

成王諱誦武王太子以歲乙酉即位在位三十七年

叔向曰成王能明文昭定武烈者也

國語

康王諱釗成王太子以歲壬戌即位在位二十六年

太子晉曰自后稷之始基靖民十八王而康克安之

國語

昭王諱瑕康王太子以歲戊子卽位在位五十一年

穆王諱滿昭王太子以歲己卯卽位在位五十五年

共王諱繁扈穆王太子以歲甲戌卽位在位十二年

懿王諱囂共王太子以歲丙戌卽位在位二十五年

孝王諱辟方共王弟以歲辛亥卽位在位十五年

夷王諱燮懿王太子以歲丙寅卽位在位十六年

厲王諱胡夷王太子以歲壬午卽位在位五十一年

宣王諱靖厲王太子以歲癸酉卽位在位四十六年

宣王承衰邦家多阻懲難思理官人以敘山甫補闕方叔禦侮是

用中興恢復周宇

摯太常集

幽王諱宮湟宣王太子以歲己未卽位在位十一年

平王諱宜臼幽王太子以歲庚午卽位歲辛未東遷於洛

后稷居邠太王作周丹開雀錄火降烏流三分既有八百不謀蒼
兕誓衆白魚入舟成康之日政簡刑措南巡不還西服莫附共和
之後王室多故檠弧興謠實傾周祚

司馬貞
索隱

右周自武王元年己卯至平王元年辛未共都鎬三百五十三

年

按周室中葉有遷都之舉皆在
陝境故不詳書而統以鎬京云

秦

姓嬴氏

始皇帝諱政以歲庚辰并天下稱皇帝都於咸陽凡十二年

二世皇帝諱胡亥始皇帝少子以歲辛卯秋七月卽位在位三年

王子嬰始皇帝孫以歲甲午卽位乙未出降於漢凡一年

周歷已移秦直其位呂政殘虐然以諸侯十三并兼天下極情縱
欲三十七年兵無所不加制作政令施於後王蓋得聖人之威始

皇既歿胡亥極愚酈山未畢復作阿房以遂前策任用趙高殘虐
促期雖居形便之國猶不得存子嬰度次得嗣冠玉冠佩華紱立
黃屋從百司謁七廟小人乘非位莫不悅忽失守偷安日月獨能
長念却慮父子作權近取於戶牖之間竟誅猾臣爲君討賊吾讀
秦紀至於子嬰車裂趙高未嘗不健其決憐其志嬰死生之義備
矣

班蘭

臺集

右秦自始皇帝二十六年庚辰至子嬰元年乙未共都咸陽一
十六年

漢

姓劉氏

高皇帝諱邦沛人以歲己亥春二月滅楚卽皇帝位夏五月定都長
安在位八年

周秦之間可謂文倣矣秦政不改反酷刑法豈不繆乎故漢興承

敝易變使人不倦得天統矣

史記高祖本紀

孝惠皇帝諱盈高祖太子以歲丙午夏五月卽位在位七年

孝惠內修親親外禮宰相優寵齊悼趙隱恩敬篤矣聞叔孫通之

諫則瞿然納曹相國之對而心悅可謂寬仁之主遭呂太后虧損

至德悲夫

漢書惠帝紀○按惠帝後呂氏稱制九年所立兩少帝皆非孝惠子也史漢紀傳載之已詳故不書

孝文皇帝諱恒高祖仲子以歲辛酉秋九月卽位在位二十三年

孔子言必世然後仁善人之治國百年亦可以勝殘去殺誠哉是

言漢興至孝文四十有餘載德至盛也廩廩鄉改正服封禪矣謙

讓未成於今嗚呼豈不仁哉

史記文帝本紀

孝景皇帝諱啟孝文帝太子以歲甲申夏六月卽位在位十六年

孔子稱斯民三代之所以直道而行也信哉周秦之敝罔密文峻而姦軌不勝漢興掃除煩苛與民休息至於孝文加之以恭儉孝

景遵業五十六載之間至於移風易俗黎民醇厚周云成康漢言

文景美矣

漢書景帝紀

孝武皇帝諱徹景帝太子以歲庚子春正月卽位在位五十四年

漢承百王之弊高祖撥亂反正文景務在養民至於稽古禮文之事猶多闕焉孝武初立卓然罷黜百家表章六經遂疇咨海內舉其俊茂與之立功興太學修郊祀改正朔定曆數協音律作詩樂建封禪禮百神紹周後號令文章煥焉可述後嗣得遵洪業而有三代之風如武帝之雄才大略不改文景之恭儉以濟斯民雖詩書所稱何有加焉

漢書武帝紀

孝昭皇帝諱弗陵武帝太子以歲甲午春二月卽位在位十三年

昔周成以孺子繼統而有管蔡四國流言之變孝昭幼年卽位亦有燕蓋上官逆亂之謀成王不疑周公孝昭委任霍光各因其時

以成名大矣哉承孝武奢侈餘敝師旅之後海內虛耗戶口減半
光知時政之要輕徭薄賦與民休息至始元元鳳之間匈奴和親
百姓充實舉賢良文學問民所疾苦議鹽鐵而罷榷酤尊號曰昭
不亦宜乎

漢書昭
帝紀

孝宣皇帝諱詢武帝曾孫戾太子孫也以歲丁未秋七月卽位在位
二十五年

孝宣之治信賞必罰綜核名實政事文學法理之士咸精其能至
於技巧工匠器械自元成間鮮能及之亦足以知吏稱其職民安
其業也遭值匈奴乖亂推亡固存信威北夷單于慕義稽首稱藩
功光祖宗業垂後嗣可謂中興侔德殷宗周宣矣

漢書宣
帝紀

孝元皇帝諱奭宣帝太子以歲壬申冬十二月卽位在位十六年
元帝多材藝善史書鼓琴瑟吹洞簫自度曲被歌聲分剗節度窮

極幼眇少而好儒及卽位徵用儒生委之以政貢薛韋匡迭爲宰相而上牽制文義優游不斷孝宣之業衰焉然寬弘盡下出於恭儉號令溫雅有古之風烈

漢書元帝紀

孝成皇帝諱驚元帝太子以歲戊子夏六月卽位在位二十六年

成帝善修容儀升車正立不內顧不疾言不親指臨朝淵默尊嚴若神可謂穆穆天子之容者矣博覽古今容受直辭公卿稱職奏議可述遭世承平上下和睦然湛於酒色趙氏亂內外家擅朝言之可爲於邑建始以來王氏始執國命哀平短祚莽遂篡位蓋其威福所由來者漸矣

漢書成帝紀

孝哀皇帝諱欣元帝孫定陶恭王子也成帝立爲太子以歲甲寅夏四月卽位在位六年

孝哀自爲藩王及充太子之宮文辭博敏幼有令聞睹孝成世祿

去王室權柄外移是故臨朝屢誅大臣欲強主威以則武宣雅性
不好聲色時覽下射武戲卽位痿痺末年寢劇饗國不永哀哉

哀帝紀

漢書

孝平皇帝諱衍元帝孫中山孝王子也哀帝無嗣以歲庚申秋九月
入卽位在位五年

孝平之世政自莽出褒善顯功以自尊盛觀其文辭方外百蠻無
思不服休徵嘉應頌聲並作至乎變異見於上民怨於下莽亦不

能文也

漢書平
帝紀

孺子嬰宣帝元孫廣戚侯顯子也王莽攝政以歲乙丑冬十二月徵
入爲平帝後至歲己巳春正月廢爲定安公凡三年

右漢自高帝漢五年己亥至孺子初始元年己巳共都長安二
百一十年

姓司馬氏

孝愍皇帝諱業字彥旗武帝孫吳孝王晏子也初嗣封秦王以歲癸酉夏四月卽位於長安丙子冬十一月降於劉曜長安陷在位四年帝之繼皇統也屬永嘉之亂長安城中戶不盈百墻宇頽毀蒿棘成林朝廷無車馬章服惟桑版署號而已衆惟一旅公私有車四乘器械多闕運饋不繼巨猾滔天帝京危急諸侯無釋位之志征鎮闕勤王之舉故君臣窘迫以至殺辱云

晉書愍帝紀

右晉愍帝自建興元年癸酉至四年丙子共都長安四年

按愍帝以

前漢獻晉惠俱經徙都長安然一則見逼於董卓一則被劫於張方此與明皇幸蜀何異非建都實事也愍帝當洛京傾覆之日正位關中雖立國不以而人心實係屬於此所當大書以伸大義者也

姓元氏

孝武皇帝諱修孝文帝孫廣平王懷子也以歲甲寅秋七月自洛陽

西都長安凡一年

文皇帝諱寶炬孝文帝孫京兆王愉子也初封南陽王以歲乙卯春正月卽位在位十七年

廢帝諱欽文帝太子以歲辛未春三月卽位在位三年

恭皇帝諱廓文帝第四子初封齊王以歲甲戌春正月卽位丙子冬十二月禪位於周在位三年

莊帝而後魏室土崩主祭祀者不殊於寄坐遇黜辱者有甚於奕棋雖以孝武之長祗以速是奔波文帝以剛強之質終以守雌自寶恭帝運終天祿高蹈唐虞各得其時也

北史西魏本紀

右西魏自孝武帝永熙三年甲寅至恭帝三年丙子共都長安

二十三年

姓宇文氏

孝閔皇帝諱覺代武川人安定公泰世子也初封周公以歲丁丑春正月受禪在位一年

孝閔承旣安之業應樂推之運崇天竺物正位君臨邇無異言遠無異望雖黃初代德太始受終不之尚也然政由甯氏主懷芒刺之疑祭則寡人臣無復子之請以之速禍宜哉

周書閔帝紀

世宗明皇帝諱毓閔帝庶兄初封寧都公以歲丁丑秋九月入卽位在位四年

世宗寬仁遠度獻哲博聞處代邸之尊實文昭之長豹姿已變龍德猶潛而百辟傾心萬方注意及乎迎宣黜賀入纂大宗禮貌功臣敦睦九族率由恭儉崇尚文儒疊疊乎其有君人之德者矣始則權臣專制政出私門終乃鴆毒潛加享年不永惜哉

周書明帝紀

高祖武皇帝諱邕明帝弟初封魯公以歲庚辰夏四月入卽位在位

十八年

自東西否隔二國爭強疆場之事一彼一此高祖英威電發朝政
維新內難既除外畧方始乃苦心焦思克已勵精勞役爲士卒之
先居處同匹夫之儉修富民之政務強兵之術五年之間大勲斯
集據祖宗之宿憤拯東夏之阡危盛矣哉其有成功者也若使翼
日之瘳無爽經營之志獲申黷武窮兵雖見譏於良史雄圖遠畧
足方駕於前王者歟

周書武帝紀

宣皇帝諱贇武帝太子以歲戊戌夏六月卽位己亥春二月內禪在
位一年

高祖識嗣子之非才顧宗祏之至重滯愛同於晉武則哲異於宋
宣卒使昏虐君臨奸回肆毒善無小而必棄惡無大而弗爲然猶
及子而亡幸哉

周書宣
帝紀

靜皇帝諱闡本名衍宣帝太子以歲己亥春二月卽位辛丑禪位於隋在位二年

靜帝起自幼冲紹茲衰緒內相挾孫劉之詐戚藩無齊代之強隋氏因之遂遷龜鼎嗚呼以太祖之克隆景業未踰二紀不祀忽諸斯蓋宣帝之餘殃非孺子之罪戾也

周書靜帝紀

右周自閔帝元年丁丑至靜帝大定元年辛丑共都長安二十

五年

隋

姓楊氏

高祖文皇帝諱堅弘農華陰人以歲辛丑春二月受禪在位二十四年

高祖以外戚之尊受託孤之任乘茲機運遂遷周鼎於時蠻夷猾夏荆揚未一劬勞日是經營四方樓船南邁則金陵失險驃騎北

指則單于款塞雖晉武之克平吳會漢宣之推亡固存比義論功不能尚也七德既敷九歌已洽要荒咸暨尉候無警於是躬節儉平徭賦倉廩實法令行君子咸樂其生小人各安其業人物殷阜朝野歡娛二十年間天下無事區宇之內晏如也但無寬仁之度有刻薄之資暨乎暮年此風逾扇又聽哲婦之言惑邪臣之說溺寵廢嫡託付失所墳土未乾天下已非隋有惜哉迹其衰怠之源稽其亂亡之兆起自高祖成於煬帝所由來遠矣

隋書文帝紀

煬皇帝諱廣文帝太子以歲甲子秋七月卽位在位十三年

煬帝爰在弱齡早有令聞昆弟之中獨著聲績於是矯情飾貌肆厥姦回故得獻后鍾心文皇革慮天方肇亂遂登儲兩踐峻極之崇基承丕顯之休命地廣三代威振八紘負其富強之資思逞無厭之欲狹殷周之制度尚秦漢之規摹恃才矜已傲狠明德淫荒

無度法令滋章驕怒之兵屢動土木之功不息旌旗萬里徵稅百端猾吏侵漁人不堪命自是海內騷然無聊生矣俄而元感肇黎陽之亂匈奴有雁門之圍天子方棄中土遠之揚越姦宄乘釁蠅毛而起四方萬里簡書相續猶謂鼠竊狗盜不足爲虞上下相蒙莫肯念亂遂以萬乘之尊死於一夫之手社稷顛隕本枝殄絕自肇有書契以迄於茲未有若斯之甚也傳曰吉凶由人祇不妄作又曰兵猶火也不戢將自焚觀隋室之存亡斯言信而有徵矣

隋書

煬帝紀

恭皇帝諱侑煬帝孫元德太子之子也初封代王以歲丁丑冬十一月唐公李淵立帝於長安戊寅夏五月禪位於唐在位二年

恭帝年在幼冲遭家多難一人失德四海土崩既鍾百六之期躬踐數終之運謳歌有屬笙鐘變響雖欲不遵堯舜之迹庸可得乎

帝紀

右隋自高祖開皇元年辛丑至恭帝義寧二年戊寅共都長安三十八年

姓李氏

高祖皇帝諱淵隴西成紀人以歲戊寅夏五月受禪在位九年

唐在周隋之際世雖貴矣然烏有所謂積功累仁之漸而高祖之興亦何異因時而特起者歟雖其有治有亂或絕或微然其有天

下年幾三百可謂盛哉豈非人厭隋亂而蒙德澤繼以太宗之治

唐書高祖本紀

太宗皇帝諱世民高祖次子以歲丙戌秋八月卽位在位二十三年盛哉太宗之烈也其除隋之亂比迹湯武致治之美庶幾成康自古功德兼隆由漢以來未之有也至其牽於多愛復立浮圖好大

喜功勤兵於遠此中材庸主之所常為然春秋之法常責備於賢

者是以後世君子莫不歎息於斯焉

唐書太宗本紀

高宗皇帝諱治太宗太子初封晉王以歲己酉夏六月即位在位三

十四年

大帝往在藩儲見稱長者暨昇旒宸頓異明哉虛襟似納於觸鱗

下詔無殊於扇暘既蕩情於帷簿遂忽怠於基局卒致盤維盡戮

宗社為墟所謂一國為一人興前賢為後愚廢信矣哉

舊唐書高宗本紀

中宗皇帝諱顯高宗太子以歲癸未冬十二月即位在位二十七年

按中宗嗣聖元年武氏即遷帝房州十五年始還東都在東宮者八年是中宗在位僅六年耳然帝在房州唐統未絕即以中宗紀

年可也故通為

二十七年云

孝和皇帝越自負宸遷於房陵崎嶇瘴癘之鄉契濶幽囚之地遂

得生還庸非已力洎滌除金虎再握璿衡不能罪已以謝萬方而

更漫游以隳八政縱艷妻之煽黨信妖女以撓權桓敬由之覆族
節愍所以興戈也

舊唐書中
宗本紀

睿宗皇帝諱旦中宗母弟初封相王以歲庚戌夏六月入卽位在位
三年

元宗皇帝諱隆基睿宗太子以歲壬子秋八月卽位在位四十五年
睿宗因其子之功而在位不久固無可稱者嗚呼女子之禍於人
者甚矣自高宗至于中宗數十年間再罹女禍唐祚旣絕而復續
元宗親平其亂可以鑒矣而又敗以女子方其勵精政事開元之
際幾致太平何其盛也及侈心一動而溺其所甚愛忘其所可戒
至於竄身失國而不悔考其始終之異其性習之相遠也至於如
此可不慎哉可不慎哉

唐書睿宗
二宗本紀

肅宗皇帝諱亨初名嗣昇更名浚又更名璵又更名紹元宗太子以

歲丙申秋七月卽位於靈武在位七年

代宗皇帝諱豫肅宗太子以歲壬寅夏四月卽位在位十七年

天寶之亂大盜遽起天子出奔方是時肅宗以皇太子治兵討賊
得其職矣蓋自高祖以來三遜於位以授其子而獨睿宗上畏天
戒發於誠心若高祖元宗豈其志哉代宗之時餘孽猶在乎亂守
成蓋亦中材之主也

唐書肅宗本紀

德宗皇帝諱适代宗太子以歲己未夏五月卽位在位二十六年

順宗皇帝諱誦德宗太子以歲乙酉春正月卽位在位一年

憲宗皇帝諱純順宗太子以歲乙酉秋八月卽位在位十五年

德宗猜忌刻薄以彊明自任恥見屈於正論而忘受欺於姦諛及
奉天之難深自懲艾遂行姑息之政由是朝廷益弱而方鎮愈強
至於唐亡其患以此憲宗剛明果斷慨然發憤志平僭叛能用忠

謀不惑羣議卒收成功自吳元濟誅強藩悍將皆欲悔過而効順當此之時唐之威令幾於復振其爲優劣不待較而可知也及其晚節信用非人不終其業而身罹不測之禍嗚呼小人之能敗國也雖聰明聖智苟有惑焉未有不爲患者也昔韓愈言順宗在東宮二十年天下陰受其賜然享國日淺不幸疾病莫克有爲悲夫

唐書德順憲
三宗本紀

穆宗皇帝諱恒憲宗太子以歲庚子春閏正月卽位在位四年

敬宗皇帝諱湛穆宗太子以歲甲辰春正月卽位在位二年

文宗皇帝諱昂穆宗次子初封江王以歲丙午冬十二月入卽位在位十四年

武宗皇帝諱炎穆宗第五子初封潁王以歲庚申春正月入卽位在位六年

宣宗皇帝諱忱憲宗第十三子初封光王以歲丙寅春三月入卽位在位十三年

穆敬昏童失德以其在位不久故天下未至於敗亂而敬宗卒及其身文宗恭儉儒雅出於天性嘗讀太宗政要慨然慕之及卽位銳意於治故太和之初政事修飭號爲清明然仁而少斷甘露之事禍及忠良不勝冤憤飲恨而已昔武丁得一傅說爲商高宗武宗用一李德裕遂成其功烈然除去浮圖之法而躬受道家之籙服藥以求長年以此見其非明智之不惑特好惡有不同耳宣宗精於聽斷而以察爲明無復仁恩之意嗚呼自是而後唐衰矣

穆敬文武宣

五宗本紀

懿宗皇帝諱灌宣宗長子初封鄆王以歲己卯秋八月入卽位在位十四年

僖宗皇帝諱儼初名儼懿宗第五子封普王以歲癸巳秋七月入卽位在位十六年

懿僖當唐政之始衰而以昏庸相繼乾符之際歲大旱蝗民愁盜起其亂遂不可復支蓋亦天人之會歟

唐書懿僖二宗本紀

昭宗皇帝諱晔懿宗第七子初封壽王以歲戊申春三月入卽位以歲甲子春正月遷都於洛陽在位十六年

昭宗爲人明雋初亦有志於興復而外患已成內無賢佐頗亦慨然思得非常之材而用匪其人徒以益亂跡其禍亂其漸積豈一朝一夕哉

唐書昭宗本紀

右唐自高祖武德元年戊寅至昭宗天祐元年甲子共都長安

二百八十七年

后妃

后妃承乾毓聖正位宮闈產自秦封實維內政所自出而亦斯土之光也有則悉登其都秦者不既錄

上古

姜嫄

厥初生民時維姜嫄詩經大雅帝嚳上妃有邰氏之女也曰姜嫄氏戴

禮高辛氏上妃有駘氏曰姜原清淨專一而好稼穡衣帝衣履帝

履居碁而生棄路史疏駘在始平武功縣左傳杜註古磬城在縣南八

里漆村東古有磬氏之國也武功縣志○按邰駘磬字並同

周

褒姒

昔夏后氏之衰也有二龍止於帝庭而言曰余褒之二君夏帝請

其釐而藏之比三代莫敢發厲王之末發而觀之釐流於庭化為

元龜入後宮後宮之童妾既亂而遭之既笄而孕無夫而生子懼

而棄之宣王時童女謠曰檠弧箕服實亡周國有夫婦賣是器者

宣王使執而戮之逃於道見鄉者後宮所棄妖子於路哀而收之
遂亡奔於褒褒人有罪請入所棄女子於王以贖罪是為褒姒當
幽王三年王之後宮見而愛之竟廢申后以褒姒為后褒姒不好
笑幽王欲其笑萬方故不笑幽王為烽火燧有寇至則舉烽火諸侯
悉至至而無寇褒姒乃大笑幽王悅之為數舉烽火其後諸侯益
不至申侯與繒西夷犬戎攻幽王幽王舉烽火徵兵兵莫至遂虜
褒姒盡取周賂而去史記周本紀正義曰括地志云褒國城在梁州褒
城縣東二百步古褒國也周本紀注

漢
景帝皇后王氏

王太后槐里人母曰臧兒嫁為槐里王仲妻生男曰信與兩女而
仲死長女嫁為金王孫生一女臧兒卜筮之曰兩女皆當貴乃

奪金氏內之太子宫太子幸之生三女一男男方在身時王美人夢日入其懷以告太子太子曰此貴徵也未生而孝景帝卽位王夫人生男先是臧兒又入其少女兒姁兒姁生四男景帝長男榮其母栗姬齊人也立爲太子長公主嫖有女欲予爲妃栗姬不許欲予王夫人王夫人許之長公主曰譽王夫人男之美景帝亦賢之又有曩者所夢日符遂廢太子爲臨江王卒立王夫人爲皇后其男爲太子太子襲號爲皇帝兒姁早卒太后以元朔四年崩

史記

外戚世家

宣帝皇后王氏

孝宣王皇后其先高祖時有功賜爵關內侯自沛徙長陵后父奉光少時好鬪雞宣帝在民間與奉光識奉光有女年十餘歲當適人所當適輒死故以不行宣帝卽位召入宮稍進爲婕妤上憐許

太子蚤失母幾爲霍氏所害乃選後宮素謹慎而無子者遂立王
婕妤爲皇后令母養太子立十六年宣帝崩元帝卽位爲皇太后
成帝卽位爲太皇太后時成帝母亦姓王氏故世號太皇太后爲
邛成太后凡立四十九年年七十餘永始元年崩

漢書外戚傳

元帝昭儀馮氏

孝元馮昭儀平帝祖母也元帝卽位以選入後宮時父奉世爲執
金吾昭儀始爲長使數月至美人後五年就館生男拜爲婕妤內
寵與傅昭儀等建昭中上幸虎園鬪獸後宮皆坐熊佚出園攀檻
欲上殿傅昭儀等皆驚走馮婕妤直前當熊而立左右格殺熊上
問何故前當熊對曰猛獸得人而止妾恐熊至御坐故以身當之
傅昭儀等皆慙明年夏馮婕妤男立爲信都王尊婕妤爲昭儀元
帝崩爲信都太后河平中隨王之國後徙中山是爲孝王是歲王

堯有一男嗣爲王時未滿歲有胥病太后自養視數禱祠解哀帝
卽位遣謁者張由將醫治中山小王由素有狂易病病發西歸尚
書簿責擅去狀由恐因誣言中山太后祝詛上及太后太后卽傳
昭儀也素常怨馮太后因是遣御史丁元案驗無所得更使中謁
者令史立與丞相長史大鴻臚丞雜治立受傳太后指劾奏祝詛
謀反大逆責問馮太后無服辭立曰熊之上殿何其勇今何怯也
太后還謂左右此廼中語前事吏何用知之是欲陷我廼飲藥
自殺詔以諸侯王太后儀葬之

漢書外
戚傳

成帝倖仔班氏

孝成班倖仔初入後宮爲少使俄而大幸爲倖仔居增成舍再就
館有男數月失之成帝遊於後庭嘗欲與同輦辭曰觀古圖畫賢
聖之君皆有名臣在側三代末主乃有嬖女今欲同輦得無近似

上善其言而止自鴻嘉後失寵趙飛燕譖倖挾媚道祝詛後宮
詈及主上考問班倖仔對曰妾聞死生有命富貴在天修正尚未
蒙福爲邪欲以何望使鬼神有知不受不臣之愬如其無知愬之
何益上憫之賜黃金百斤趙氏姊弟驕妒倖仔恐久見危求供養
太后長信宮上許焉倖仔退處東宮作賦自傷帝崩倖仔充奉園
陵薨因葬園中

漢書外
戚傳

明帝皇后馬氏

明德馬皇后伏波將軍援小女也少喪父兄母蘭夫人悲傷發疾
后時年十歲幹理家事勅制僮御內外諮稟事同成人初援征五
溪蠻卒於師梁松竇固等因譖之家益失勢數爲權貴所侵侮從
兄嚴白太夫人求進女掖庭由是入太子宫時年十三奉承陰后
旁接同列禮則修備上下安之顯宗卽位以后爲貴人時后前母

姊女賈氏亦選入生肅宗帝令養之后撫育過所生肅宗亦孝性
惇篤慈愛無間永平三年遂立爲皇后既正位宮闈愈自謙肅常
衣大練裙不加緣朔望諸姬主朝請望見后袍衣疏麤以爲綺縠
就視乃笑后辭曰此繒特宜染色故用之耳六宮莫不歎息帝嘗
幸苑囿離宮輒以風邪露霧爲戒辭意欬備時楚獄坐繫甚衆后
慮其多濫乘間言及帝感悟多所降宥每侍執之際言及政事多
所毗補而未嘗以家私干故寵敬日隆肅宗卽位尊后曰皇太后
建初元年欲封爵諸舅太后不聽明年夏大旱有司上奏宜依舊
典太后詔固不許帝復重請太后報曰昔高祖約無軍功非劉氏
不侯今馬氏無功於國豈得與陰郭中興之后等耶嘗觀富貴之
家祿位重叠猶再實之木其根必傷吾計之熟矣夫至孝之行安
親爲上今欲先營外封違慈母之拳拳乎時外親有謙素義行者

輒假借溫言賞以財位其美車服不軌法度者便絕屬籍遣歸田里於是內外從化被服如一四年崩

後漢書
后紀

章帝皇后竇氏貴人宋氏

章德竇皇后扶風平陵人大司徒融曾孫父勲尚東海恭王彊女泚陽公主后其長女也建初二年以選例入見長樂宮進止有序風容甚盛肅宗先聞后有才色及見雅以爲美馬太后亦異焉后性敏給傾心承接稱譽日聞明年立爲皇后寵幸殊特專固後宮初宋貴人生太子慶后疾之因誣廢慶爲清河王梁貴人者梁竦女生和帝后養爲己子欲專名外家而忌梁氏八年乃作飛書陷竦竦坐誅貴人以憂卒自是宮房懔息后愛日隆和帝卽位尊后爲皇太后太后臨朝兄憲弟篤景並顯貴擅威權遂密謀不軌發覺被誅九年太后崩未葬梁貴人姊嬪上書陳貴人在歿之狀太

尉張輔司徒劉方司空張奮上奏依光武黜呂太后故事帝手詔
曰禮臣子無貶尊上之文恩不忍離義不忍虧案前世上官太后
亦無降黜其勿復議於是合葬敬陵

後漢書
后紀

宋貴人宋昌八世孫扶風平陵人也父楊二女皆有才色永平末
選入太子宫甚有寵肅宗卽位並爲貴人建初三年大貴人生慶
明年立爲皇太子貴人長於人事供奉長樂宮身執饋饌太后憐
之太后崩竇皇后寵盛以貴人姊妹並幸慶爲太子惡之謀陷宋
氏外令兄弟求其纖過內使御者偵伺得失後於掖庭門邀遮得
貴人書云病思生菟令家求之因誣言欲作蠱道祝詛以菟爲厭
勝之術諷掖庭令請加驗實七年帝遂廢慶爲清河王出貴人姊
妹置丙舍使小黃門蔡倫考實之傳致其事乃載送暴室二貴人
同時飲藥自殺帝勅掖庭令葬於樊濯聚慶時雖幼知畏禍言不

敢及宋氏和帝時慶常以貴人葬禮有闕每竊感恨竇太后崩慶求上冢致哀帝許之慶子祐立爲安帝追謚曰敬隱后又追贈后女弟小貴人印綬

後漢書清河王傳

順帝貴人竇氏

順帝初竇章女年十二能屬文以才貌選入掖庭有寵與梁皇后並爲貴人早卒帝追思無已詔史官樹碑頌德章自爲之辭

後漢書竇

章傳

桓帝皇后竇氏

桓思竇皇后章德皇后從祖弟之孫女也延熹八年選入掖庭爲貴人其冬立爲皇后永康元年冬帝崩無嗣后爲皇太后臨朝定策立解犢亭侯宏是爲靈帝時太后父大將軍武謀誅宦官中常侍曹節等矯詔殺武遷太后於南宮雲臺帝以太后有援立之功

建寧四年十月朔率羣臣朝於南宮親饋上壽黃門令董萌因爲太后訢怨帝深納之供養資奉有加於前熹平元年太后母卒於

北景后感疾崩

後漢書
后紀

靈帝皇后宋氏

宋皇后扶風平陵人建寧三年選入掖庭爲貴人明年立爲皇后父鄴執金吾封不其鄉侯后無寵而居正位後宮幸姬衆共譖毀初中常侍王甫枉誅勃海王悝及妃宋氏妃卽后之姑也甫恐后怨之乃構言皇后挾左道祝詛帝信之光和元年遂策收璽綬后自致暴室以憂死父及兄弟並被誅諸常侍小黃門在省闥者皆憐宋氏無辜共合錢物收葬廢后及鄴父子歸宋氏舊塋臯門亭

後漢書
后紀

武帝皇后楊氏楊氏

武元楊皇后諱豔字瓊芝弘農華陰人少聰慧善書姿質美麗閑於女工有善相者嘗相后當極貴文帝爲世子聘焉甚被寵遇生惠帝武帝卽位立爲皇后帝以太子不堪奉大統密語后后曰立嫡以長不以賢豈可動乎初賈充妻郭氏賂后求以女爲太子妃及議婚帝欲娶衛瓘女后盛稱賈后有淑德上乃聽之后疾見帝素幸胡夫人恐後立之慮太子不安臨終枕帝膝曰叔父駿女男引有德色願陛下以備六宮因悲泣帝許之崩年三十七

晉書后妃傳

武悼楊皇后諱芷字季蘭小字男引元后從妹以咸寧二年立爲皇后婉嫕有婦德美暎椒房太康九年率内外夫人命婦躬桑於西郊太子妃賈氏妒忌帝將廢之后言於帝曰賈公問有勲社稷賈妃親是其女不足以一背掩其大德后又數誠厲妃妃不知

后助已謂后構之於帝忿怨彌深及帝崩尊為皇太后賈后忌后父駿遂誣駿為亂稱詔誅駿駿既死詔送后永寧宮賈后諷有司奏廢為庶人初太后尚有侍御十餘人賈后奪之絕膳而崩永嘉元年追復尊號咸康七年衛將軍虞潭議上由是太后配食武帝

晉書后

妃傳

成帝皇后杜氏

成恭杜皇后諱陵陽京兆人鎮南將軍預曾孫也成帝以后奕世名德咸康二年備禮拜為皇后后有姿色然長猶無齒及帝納采之日一夜齒盡生七年三月后崩年二十一先是三吳女子相與簪白花望之如素柰傳言天公織女死為之著服至是后崩

晉書

后妃傳

太宗皇后姚氏

昭哀皇后姚氏姚興女也興封西平長公主太宗以后禮納之後以鑄金人不成未昇尊位然出入居處禮秩如后是後猶欲正位而后謙讓不當泰常五年薨帝追恨之贈皇后璽綬而後加諡魏書

皇后傳

世祖皇后赫連氏

太武皇后赫連氏屈丐女也世祖平統萬納后及二妹俱爲貴人後立爲皇后魏書皇后傳



閔帝皇后元氏

元皇后魏文帝第五女初封晉安公主帝爲略陽公尚焉及踐阼立爲后帝被廢后出俗爲尼建德初高祖誅晉國公護上帝尊號

爲孝閔帝以后爲孝閔皇后居崇義宮隋氏革命后出居里第大

業十二年殂

周書皇后傳

宣帝皇后楊氏

楊皇后隋文帝長女帝在東宮納爲皇太子妃宣政元年立爲皇后帝後自稱天元皇帝號后爲天元皇后尋冊爲元太皇后后性柔婉不如忌嬪御等咸愛而仰之帝嘗譴后欲加之罪后進止詳閑辭色不撓帝大怒遂賜后死逼令引訣后母獨孤氏聞之詣閤陳謝得免帝不豫詔后父入禁中侍疾及大漸劉昉鄭譯等矯詔以后父受遺輔政后初雖不預謀然以嗣主幼冲恐權在他族不利於已聞行此詔心甚悅之後知其父有異圖意頗不平形於言色及行禪代憤惋逾甚文帝內甚愧之開皇六年封爲樂平公主又議奪其志后誓不許乃止大業五年殂

周書皇后傳

高祖皇后竇氏昭儀宇文氏

太穆皇后竇氏京兆平陵人父毅在周爲上柱國尚武帝姊襄陽長公主后生髮垂過頸三歲與身等讀女誡列女等傳一過輒不忘武帝愛之養宮中異他甥時突厥女爲后無寵后密諫曰吾國未靖虜且強願抑情撫接以取合從則江南關東不吾梗武帝嘉納及聞隋高祖受禪自投牀下曰恨非男子不能救舅家禍毅常曰此女不凡何可妄與人因畫二孔雀屏間請婚者使射二矢陰約中目則許之射者皆不合高祖最後射中各一目遂歸於帝元貞太后羸老有疾后事之怡謹盡孝工爲篇章規誠文有雅體又善書與高祖書相雜人不辨也崩年四十五帝有天下謚曰穆及祔獻陵尊爲太穆皇后

唐書本傳

宇文昭儀隋左武衛大將軍述女也有寵於高祖高祖卽位欲立

爲皇后固辭

舊唐書韓
王元嘉傳

太宗妃楊氏賢妃徐氏

吳王恪母曰楊妃煬帝女也

大唐
新語

賢妃徐氏名惠生五月而能言四歲誦論語毛詩八歲好屬文其
父孝德試擬楚詞云山中不可以久留詞甚典美自此徧涉經史
手不釋卷太宗聞之納爲才人其所屬文揮翰立成詞華綺贍俄
拜婕妤再遷充容時軍旅亟動宮室互興百姓頗倦勞役上疏諫
之太宗善其言優賜甚厚太宗崩追思顧遇之恩哀慕愈甚發疾
不自醫謂所親曰吾荷顧實深志在早歿魂其有靈得侍園寢吾
之志也因爲七言詩及連珠以見志永徽元年卒詔贈賢妃

舊唐
書本

傳

徐齊聘湖州長城人世客馮翊姊爲太宗充容

唐書儒
學傳

高宗婕妤徐氏

徐堅齊聃子也次姑爲高宗婕妤有文藻

舊唐書
徐堅傳

中宗皇后趙氏庶人韋氏

和思皇后趙氏京兆長安人祖綽武德中終右領軍將軍父瓌尚

高祖女常樂公主帝爲英王聘后爲妃高宗於公主恩尤隆武后

不喜乃幽妃內侍省妃旣囚扃鍵牢謹日給飼料衛者候其突烟

數日不出披戶視之死腐矣神龍元年追諡曰恭皇后

唐書
中宗本傳

將葬定陵議者以韋后得罪不宜祔葬於是追諡后爲和思莫知

瘞所行招魂祔葬之禮

舊唐書
本傳

庶人韋氏京兆萬年人帝在東宮后被選爲妃嗣聖初立爲皇后
尋與帝處房陵每使至帝輒恐欲自殺后止曰禍福何常無遽及
帝復位后居中宮時敬暉等欲盡誅諸武武三思得幸於后卒謀

暉等誅之初帝幽廢與后約一朝見天日不相制至是與三思共御牀博戲帝從旁典籌不爲忤三思諷羣臣上后號爲順天皇后神龍三年節愍太子敗宗楚客率羣臣請加號翊聖於是數改制度寵樹親屬常侍馬秦客光祿少卿楊均皆烝於后帝遇弑議者咎秦客及安樂公主后大懼引所親議計乃立溫王重茂爲皇太子太子卽位后臨朝京師大恐傳言且革命臨淄王引兵夜披元武門叩太極殿后遁入飛騎營爲亂兵所殺梟首東市翼日追貶爲庶人

唐書本傳

睿宗皇后竇氏

昭成皇后竇氏平陵人抗曾孫也睿宗爲相王時爲孺人甚見禮異光宅元年立爲德妃生元宗長壽二年爲戶婢團兒誣譖與肅明皇后厭蠱咒詛正月二日朝則天皇后於嘉豫殿旣退而遇害

梓宮秘密莫知所在睿宗卽位諡曰昭成皇后睿宗崩以帝母之

重追尊爲皇太后

舊唐書本傳

元宗皇后王氏貴嬪楊氏才人莫氏

廢后王氏同州下邳人上爲臨淄王時納爲妃上將起事頗預密

謀贊成大業先天元年爲皇后后兄守一以后無子懼有廢立謀

以符厭之事有左道僧明悟爲祭南北斗刻霹靂木書天地字及

上諱合而佩之曰佩此有子當與則天比事發上親寃之皆驗開

元十二年秋七月廢爲庶人十月卒

舊唐書本傳

武妃有寵帝密欲廢

后后以愛弛不自安承間泣曰陛下獨不念阿忠脫紫半臂易斗

麪爲生日湯餅耶帝憫然動容阿忠后呼其父仁皎云由是久乃

廢當時王諲作翠羽帳賦諷帝未幾卒以一品禮葬後宮思慕之

帝亦悔寶應元年追復后號

唐書本傳

元獻皇后楊氏華州華陰人帝在東宮后以景雲初入宮為良娣時太平公主忌帝宮中左右持兩端纖悉必聞媛方娠帝不自安語侍讀張說曰用事者不欲吾多子奈何命說挾劑以入帝於曲室自煮之夢若有介而戈者環鼎三而三煮盡覆以告說說曰天命也乃止生男是為肅宗帝即位為貴嬪又生寧親公主乃薨肅宗即位上皇自蜀詔有司議上冊諡

唐書本傳

寧王常獵於鄜縣界忽見草中一櫃扃鎖甚固發視之乃一少女也問所自女言姓莫氏庄居昨夜遇賊刼至此時上方求極色王以莫氏衣冠子女即日表上之具其所由上令充才人才人能為

秦聲當時號莫才人囀

酉陽雜俎

肅宗元妃韋氏皇后張氏

韋妃京兆萬年人父元珪兖州都督肅宗為忠王時納為孺人及

昇儲位爲太子妃生堯王儻絳王侔永穆公主天寶中宰相李林甫不利於太子妃兄堅爲刑部尚書林甫羅織起柳勣之獄堅連坐得罪兄弟並賜死太子懼上表自理言與妃情義不睦請離婚妃遂削髮被尼服居禁中佛舍西京失守妃亦陷賊至

德二年薨

舊唐書本傳○按韋氏係肅宗東宮時元妃故列於張后之前

張皇后本南陽西鄂人後徙家昭應祖母竇氏元宗母昭成太后妹也昭成爲天后所殺元宗幼爲竇姨鞠養景雲中封鄧國夫人恩渥甚隆其子去逸生后天寶中選入太子宫爲良娣辨惠豐碩巧中上旨元宗幸蜀太子與良娣俱從車駕渡渭百姓遮道請留太子良娣贊之太子如靈武時賊陷京師道路多虞每太子次宿止舍良娣必居其前曰恐有倉卒妾自當之大家可由後而出至靈武產子三日起縫戰士衣太子勞之曰產忌作勞安可容易后

曰此非妾自養之時須辦大家事乾元元年四月冊爲皇后寵遇
專房干預請謁帝頗不悅寶應元年四月肅宗大漸后與內官朱
輝光等謀立越王係矯詔召太子入侍疾中官程元振李輔國知
其謀太子入二人以難告元振率禁軍收捕輝光等俄而肅宗崩
太子監國遂移后於別殿幽崩舊唐書本傳
德宗賢妃韋氏

賢妃韋氏戚里舊族也初爲良娣貞元四年冊拜賢妃性敏淑言
動有繩矩帝重之後宮莫不師其行帝崩自表留奉崇陵園元和

四年薨

唐書本傳

憲宗貴妃郭氏

懿安皇后郭氏汾陽王子儀之孫父曖尚昇平公主實生后憲宗
爲廣陵王聘爲妃生穆宗元和元年進冊貴妃八年羣臣三請立

爲后以歲子午忌報罷穆宗嗣位上尊號皇太后移御興慶宮凡
朔望三朝帝率百官詣宮門爲壽或歲時慶問燕饗後宮戚里內
外婦車騎駢壅帝崩中人有爲后謀稱制者后怒曰吾效武氏耶
太子雖幼可選重德爲輔吾何與外事哉敬宗立號太皇太后江
王嗣位是爲文宗性謹孝事后有禮武宗喜畋游他日問后起居
從容請曰如何可爲盛天子后曰諫臣章疏宜審覽母拒直言勿
納偏言以忠良爲腹心此盛天子事也帝還索諫章閱之往往道
遊獵事自是畋幸稀宣宗立於后諸子也而母鄭故侍兒有曩怨
帝奉養益稍薄后鬱鬱不聊與一二侍人登勤政樓將自隕左右
共持之帝聞不喜是夕后暴崩唐書本紀宣帝追恨先陵商臣之酷卽
位後誅鋤惡黨無漏網者時郭太后無恙且懷慚懼旣崩喪服如
故事禮院檢討官王皞抗疏請后合葬景陵配享憲宗廟室疏入

上大怒宰臣白敏中詰其事皐曰郭太后是憲宗春宮時元妃汾陽王孫逮事順宗爲新婦憲宗厭代之夕事出暗昧不可以暗昧之事黜合食之禮翼日貶句容令大中十三年秋上崩令狐綯爲山陵使奏皐爲判官皐論懿安合配享憲宗始升祔焉

東觀奏記

後唐

明宗淑妃王氏

淑妃王氏邠州餅家子也有美色號花見羞明宗求別室安重誨以告明宗而納之明宗夫人曹氏簡質常避事由是專寵明宗卽位立爲淑妃宮中之事皆主於妃後宮有生子者命妃母之是爲許王從益晉高祖遷都汴以妃母子俱東置於宮中高祖皇后事妃如母出帝卽位妃母子還洛陽耶律德光北歸留蕭翰守汴州翰欲北去召從益委以中國遂以從益權知南朝軍國事羣臣入

謁妃曰吾家子母孤弱爲翰所迫禍行至矣漢高祖擁兵而南從益謀閉城自守妃曰吾家亡國之餘安敢與人爭天下乃遣人上書迎高祖高祖遣郭從義先入京師殺妃母子妃臨死呼曰吾家母子何罪何不留吾兒使每歲寒食持一盂麥飯灑明宗墳上聞者悲之

五代史唐家人傳

太祖皇后王氏

孝明王皇后邠州新平人彰德軍節度饒第三女周顯德五年太祖聘爲繼室后恭勤不懈仁慈御下太祖卽位建隆元年八月冊爲皇后常服寬衣佐御膳善彈箏鼓瑟晨起誦佛書事杜太后得驩心乾德元年崩年二十二

宋史后妃傳

愍帝禮妃田氏

田氏華陰人崇禎元年選入宮冊爲禮妃

賈志

太子

太子國之儲副都秦之世失愛失德二者交譏備書之以存鑒其追冊者不錄

周

幽王太子伯服

幽王嬖褒姒生子伯服幽王欲廢太子太子母申侯女而爲后後

幽王得褒姒愛之廢申后並去太子宜臼以伯服爲太子

史記周本紀

秦

始皇帝太子扶蘇

始皇三十七年十月行出游長子扶蘇以數直諫上使監兵上郡

少子胡亥愛請從上許之其年七月始皇帝至沙邱病甚令趙高

爲書賜公子扶蘇曰以兵屬蒙恬與喪會咸陽而葬書已封未授

使者始皇崩書及璽皆在趙高所趙高謂胡亥曰上崩無詔封諸子而獨賜長子書長子至卽立爲皇帝而子無尺寸之地奈何請爲子與丞相謀之高乃謂丞相斯曰上崩賜長子書立爲嗣書未行未有知者所賜書及符璽皆在胡亥所定太子在君侯與高之口耳事將何如斯曰此非人臣所當議也高曰皇帝二十餘子皆君所知長子剛毅而武勇信人而奮士卽位必用蒙恬爲丞相君侯終不懷通侯之印歸於鄉里明矣高受詔教習胡亥數年未嘗見過失可以爲嗣君計而定之於是斯乃聽高高乃詐爲書賜扶蘇曰朕巡天下禱祀名山諸神以延壽命今扶蘇與將軍蒙恬將師數十萬屯邊十有餘年矣無尺寸之功乃以不得罷歸爲太子日夜怨望扶蘇爲人子不孝其賜劔自殺封其書以皇帝璽遣胡亥客奉書賜扶蘇於上郡使者至發書扶蘇泣入內舍歛自殺蒙

恬止扶蘇曰陛下使臣將三十萬衆守邊公子爲監此天下重任也今一使者來卽自殺安知其非詐復請而後死未暮也使者數趣之扶蘇爲人仁謂恬曰父賜子死尚安復請卽自殺

史記李斯傳

漢

景帝太子榮

臨江閔王榮以孝景前四年爲皇太子四歲廢爲臨江王四年坐侵廟壙垣爲宮上徵榮榮至詣中尉府簿中尉郅都責訊王王恐自殺葬藍田燕數萬銜土置冢上百姓憐之榮最長死無後國除

史記五宗世家

武帝太子據

戾太子據衛皇后生元狩元年立爲皇太子年七歲矣少壯詔受公羊春秋又從瑕邱江公受穀梁及冠就宮上爲立博望苑使通

賓客從其所好多以異端進者元鼎四年納史良娣產子男進號
曰史皇孫武帝末衛后寵衰江充用事充與太子及衛氏有隙會
巫蠱事起充因此爲姦白言宮中有蠱氣遂至太子宫掘蠱得桐
木人太子召問少傅石德德懼并誅因謂太子曰上疾在甘泉皇
后及家吏請問皆不報上存亡未可知而姦臣如此太子將不念
秦扶蘇事耶太子急然德言征和二年七月壬午使客爲使者收
捕充等白皇后發兵告令百官曰江充反乃斬充以徇遂部賓客
爲將率與丞相劉屈氂等戰太子兵敗亡不得上怒甚羣下憂懼
不知所出壺關三老茂上書曰皇太子爲漢適嗣承萬世之業體
祖宗之重親則皇帝之宗子也江充閭閻隸臣陛下顯而用之銜
至尊之命以迫蹙皇太子太子進則不得上見退則困於亂臣不
忍忿忿之心起而殺充恐懼逋逃子盜父兵以救難自免耳臣竊

以爲無邪心書奏天子感寤太子之亡也東至湖匿泉鳩里發覺吏圍捕太子太子自度不得脫卽入室距戶自經皇孫二人并遇害久之巫蠱事多不信上知太子惶恐無他意車千秋復訟太子寃上憐太子無辜乃作思子宫爲歸來望思之臺於湖天下聞而

悲之

漢書本傳

備

文帝太子勇

房陵王勇高祖長子也高祖受禪立爲皇太子軍國政事皆令叅決勇頗好學解詞賦性寬仁和厚率意任情無矯飾之行後冬至百官朝勇勇張樂受賀高祖知之下詔曰皇太子雖居上嗣義兼臣子而諸方岳牧正冬朝賀別上東宮事非典則宜悉停斷自此恩寵始衰勇多內寵昭訓雲氏尤稱嬖幸妃元氏薨昭訓專擅內

政后彌不平遣人求勇罪過晉王知之始構奪宗之計因深交楊素後素入侍宴盛言太子不才后遂有廢立之意高祖使楊素觀勇素還言勇怨望高祖疑之后因加媒孽構成其罪於是勇及諸子皆被禁錮部分收其黨與楊素鍛鍊成獄高祖御武德殿集百官引勇及諸子列於庭命薛道衡宣詔廢爲庶人勇再拜泣下旣而舞蹈而去乃立晉王廣爲皇太子仍以勇付之囚於東宮勇自以廢非其罪頻請見上面申冤屈皇太子過之於是升樹大叫聲聞於上素奏勇情志昏亂爲癲鬼所著不可復收卒不得見高祖寢疾皇太子姦亂宮闈事聞高祖抵牀曰枉廢我兒因遣追勇未發使高祖暴崩僞勅賜庶人死追封房陵王不立嗣

隋書本傳

李綱開

皇末爲太子洗馬太子廢文帝召東宮官屬切讓之無敢對者綱對曰太子器非上品性是常人若得賢明之士輔導之足堪繼嗣

皇業奈何以絃歌鷹犬之才居其側至令致此此陛下訓導不足
豈太子之罪耶辭氣凜然左右皆失色

舊唐書
李綱傳

煬帝太子昭

元德太子昭煬帝長子也生而高祖命養宮中高祖嘗謂曰當爲
爾娶婦昭應聲而泣高祖問其故對曰漢王未婚時恒在至尊所
一朝娶婦便則出外懼將遠離是以啼耳上歎其有至性煬帝卽
位幸雒陽宮昭留守京師大業元年遣使者立爲皇太子昭有武
力能引強弩性謙冲言色恂恂未嘗忿怒所膳不許多品帷席極
儉素臣吏有老父母者必問其安否歲時皆有惠賜明年朝雒陽
將還京師願得少留帝不許拜請無數體素肥因致勞疾帝令巫
者視之云房陵王爲祟未幾薨

隋書
本傳

高祖太子建成

建成高祖長子也初封隴西郡公從平長安武德元年立爲皇太子時太宗功業日盛高祖私許立爲太子建成密知之乃潛謀作亂劉黑闥反王珪魏徵謂建成曰殿下以地居嫡長爰踐元良秦王勲業克隆威震四海人心所向殿下何以自安今黑闥破亡之餘衆不盈萬加以糧運限絕瘡痍未瘳大軍一臨可不戰而擒也願請討之以立功建成從其計遂請討黑闥擒之時高祖晚生諸王諸母擅寵建成陰與元吉連結後宮譖訴愈切高祖惑之太宗懼不知所爲李靖李勣等勸太宗圖之不許九年突厥犯邊詔元吉率師拒之元吉因兵集將與建成克期舉事長孫無忌等日夜固爭太宗然其計六月三日密奏建成元吉欲殺臣爲世克建德報仇高祖愕然四日太宗將左右九人入至元武門自衛高祖召

裴寂等欲令窮覈其事建成元吉行至臨湖殿覺變卽廻馬將東歸宮府太宗隨而射之建成應弦而斃時年三十八太宗卽位追封息王諡曰隱以禮改葬十六年五月又追贈皇太子諡仍依舊

舊唐書
本傳

太宗太子承乾

恒山王承乾太宗長子也生於承乾殿因名太宗卽位爲皇太子時年八歲性聰敏太宗居諒闇庶政皆令聽斷每行幸常令居守監國及長好聲色慢遊無度魏王泰有美譽太宗漸愛重之承乾恐有廢立甚忌之有太常樂人美姿容承乾特加寵幸號曰稱心太宗大怒收稱心殺之承乾自此託疾不朝叅者數月時左庶子于志寧右庶子孔穎達受詔輔導志寧撰諫苑二十卷諷之穎達又多所規奏太宗並嘉之未幾志寧去職承乾侈縱日甚太宗復

起志寧爲詹事志寧與左庶子張元素數上書切諫承乾並不納
尋與漢王元昌等謀反將縱兵入西宮紇干承基告其事太宗廢
承乾爲庶人徙黔州十九年卒於徙所葬以國公之禮

舊唐書本傳

高宗太子忠弘賢

燕王忠字正本高宗長子也

舊唐書本傳

帝始爲太子而忠生宴宮中

俄而太宗臨幸詔宮臣曰朕始有孫欲共爲樂酒酣帝起舞以屬

羣臣在位皆舞賚賜有差永徽初拜雍州牧王皇后無子后舅柳

奭說后以忠母微立之必親已后然之請於帝遂立爲皇太子后

廢武后子弘甫三歲許敬宗希后旨建言國有正嫡太子宜同漢

劉彊故事於是降封梁王俄徙房州刺史忠寢懼數有妖夢常自

占事露廢爲庶人囚黔州麟德初敬宗誣忠謀反賜死無子明年

太子弘表請收葬許之

唐書本傳

孝敬皇帝弘高宗第五子也封代王顯慶元年立爲皇太子嘗憂
春秋左氏傳於率更令郭瑜至楚子商臣之事廢卷而歎曰此事
非惟口不可道亦耳不忍聞請改讀餘書瑜請讀禮記從之咸亨
二年駕幸東都留太子監國時戴至德張文瓘蕭德昭同爲輔弼
太子多疾病庶政皆決於至德等太子納右衛將軍裴居道女爲
妃裴氏甚有婦禮高宗常謂侍臣曰東宮內政吾無憂矣上元二
年薨諡爲孝敬皇帝葬恭陵

舊唐書本傳

弘仁孝賓禮大臣未嘗有過

后將騁志弘奏請數拂旨上元二年從幸合璧宮遇酖薨年二十

四天下痛之

唐書本傳

章懷太子賢字明允高宗第六子也

舊唐書本傳

上元二年六月立爲

皇太子俄詔監國賢處決明審朝廷稱焉時正諫大夫明崇儼以
左道爲武后所信賢惡之調露中天子在東都崇儼爲盜所殺后

疑出賢謀遣人發太子陰事廢爲庶人開耀元年徙巴州武后得政詔左金吾將軍邱神勣迫令自殺年三十四睿宗立追贈皇太子及謚唐書本傳高宗有八子天后所生三子自爲行故睿宗第四長曰弘爲太子仁明孝悌天后方圖臨朝鴆殺之立雍王賢賢每日憂惕無由敢言乃作黃臺瓜辭令樂工歌之冀天后聞之省悟辭云種瓜黃臺下瓜熟子離離一摘使瓜好再摘令瓜稀三摘猶尚可四摘抱蔓歸賢終爲后所逐死黔中舊唐書承天皇帝傳

中宗太子重潤重俊

懿德太子重潤中宗長子也開耀二年生於東宮內殿高宗甚悅是歲立爲皇太孫開府置官屬及中宗遷房州其府坐廢大足元年爲人所構則天令杖殺時年十九重潤風神俊朗早以孝友知名死非其罪大爲當時所悼惜舊唐書本傳

節愍太子重俊中宗第三子也神龍二年秋立爲皇太子

舊唐書本傳

重俊性明果然少法度武三思挾韋后勢將圖逆內忌太子以非
韋出數請廢三年七月重俊恚忿率李多祚等矯發左羽林及千
騎兵殺三思崇訓并其黨十餘人自率兵趨肅章門斬關入索韋
后安樂公主上官昭容所在后挾帝升元武門召右羽林將軍劉
仁景等率留軍千騎百人拒之多祚兵不得進帝據檻語千騎曰
能斬賊者有賞於是士倒戈斬多祚重俊亡入終南山爲左右所
殺詔殊首朝堂獻太廟并以告三思崇訓柩睿宗立加贈謚陪葬

定陵

唐書本傳

睿宗太子憲

憲始王永平武后以睿宗爲皇帝故立爲皇太子睿宗降爲皇嗣
更冊爲皇孫與諸王皆出閣開府置官屬唐隆元年進封宋睿宗

將建東宮以憲嫡長又嘗爲太子而楚王有大功故久不定憲涕泣固讓遂許之元宗討定蕭岑之難授開府儀同三司徙王寧開元二十九年薨追謚讓皇帝

唐書本傳

元宗太子瑛

廢太子瑛元宗第二子也本名嗣謙開元三年正月立爲皇太子十年正月加元服又令詣國子學行齒胄禮瑛母趙麗妃本伎人善歌舞元宗在潞州得幸及武惠妃寵幸麗妃恩漸弛瑛自謂母氏失職嘗有怨望惠妃女咸宜公主降楊洞洞希惠妃旨日求其短譖於惠妃妃泣訴於元宗元宗感其言謀於宰相將廢黜張九齡奏曰太子國本難於動搖今太子旣長無過臣待罪左右敢不詳悉元宗默然事且寢其年李林甫代張九齡爲中書令二十五年四月楊洞又構於惠妃元宗召宰相籌之林甫曰此陛下家事

臣不合參知元宗意乃決使中官宣詔廢爲庶人俄賜死寶應元年詔雪瑛罪追贈皇太子

舊唐書本傳

憲宗太子寧

寧憲宗長子也元和元年封鄧王四年閏三月立爲皇太子其年有司將行冊禮以孟夏孟秋再卜日臨事皆以雨罷至十月方行

冊禮六年十二月薨年十九諡曰惠昭

舊唐書本傳

敬宗太子成美

敬宗第五子陳王成美初文宗以莊恪薨大臣數請建東宮開成四年立成美爲皇太子典冊未具而帝崩仇士良立武宗殺之於

邸

唐書本傳

文宗太子永

莊恪太子永文宗長子也母曰王德妃太和四年封魯王六年十

月冊爲皇太子卽位以晉王謹愿欲建爲儲貳未幾晉王薨不復言東宮事久之有是命中外慶悅開成三年上以太子宴遊敗度不可教導將議廢黜御史中丞狄兼謩雪涕以諫翼日翰林學士六人洎神策六軍軍使十六人又進表陳論上意稍解其年薨時傳云德妃寵衰賢妃楊氏恩渥方深懼太子他日不利於已日加誣譖太子不能自明旣薨上追悔四年因會寧殿宴小兒緣幢有一夫在下憂其墮地有若狂者上問之乃其父也上感泣顧謂左右曰朕有天下不能全一子遂召樂官劉楚材等責之曰陷太子皆爾曹也立殺之

舊唐書本傳

昭宗太子裕

裕昭宗長子也乾寧四年二月十四日冊爲皇太子

舊唐書本傳

帝幸

華州韓建奪諸王兵旣又殺諸王因請立裕爲皇太子劉季述等

幽帝東內奉裕卽皇帝位季述誅裕匿右軍或請殺之帝曰太子何罪詔還少陽院復爲王朱全忠自鳳翔還見王春秋盛標字軒秀忌之密語崔引曰王旣竊帝矣渠可留公盍啟之引從容言如全忠意不許帝遷洛他日謂蔣元暉曰德王朕愛子全忠奈何欲殺之言已泣下元暉卽撫語全忠全忠恚帝被弑元暉置酒邀王飲九曲池飲酣殺之投尸水中

唐書本傳

諸王

帝王之子展親胙土其有封爵詳各省誌者不錄惟蚤歲無祿者合都秦諸帝子計之所傳亦寥寥也爲具其世次如左

始皇帝諸子

將閭

高

二世陰與趙高謀行誅諸公子公子將閭昆弟三人囚於內宮議其罪獨後二世使使令將閭曰公子不臣罪當死吏致法焉將閭曰闕廷之禮吾未嘗敢不從賓贊也廊廟之位吾未嘗敢失節也

受命應對吾未嘗敢失辭也何謂不臣願聞罪而死使者曰臣不
得與謀奉書從事將閭乃仰天大呼天者三曰天乎吾無罪昆弟

三人皆流涕拔劍自殺史記秦始
皇本紀

二世更為法律諸公子有罪輒下高令鞠治之公子十二人戮死

咸陽市公子高欲奔恐收族乃上書曰先帝無恙時臣入則賜食

出則乘輿御府之衣臣得賜之中廐之寶馬臣得賜之臣當從死

而不能為人子不孝為人臣不忠無名以立於世臣請從死願葬

驪山之足惟上幸哀憐之書上胡亥大說賜錢十萬以葬李斯
傳

唐

高祖諸子 元霸 智雲

元霸高祖第三子也舊唐書
本傳衛懷王元霸字大德幼辨惠隋大業

十年薨年十六無子武德元年追王及諡又贈秦州總管司空以

太宗子泰為宜都王奉其祀葬芷陽泰徙封越更以宗室西平王

瓊子保定嗣唐書本傳

智雲高祖第五子也舊唐書本傳楚哀王智雲初名稚詮善射工書奕

隋大業末從建成寓河東高祖初建成走太原吏捕智雲送長安

為陰世師所害年十四武德元年追王及謚三年以太宗子寬為

嗣又贈涼州總管司徒寬早薨國除貞觀二年復以濟南公世都

子靈龜嗣唐書本傳

元宗諸子一敏

夏悼王一元宗第九子也母貞順皇后一生而美秀上鍾愛名之

為一開元五年孩孺而薨追封謚時車駕在東都葬於城南龍門

東岑欲宮中舉目見之舊唐書本傳

懷哀王敏元宗第十五子也幼而豐秀以母惠妃之寵元宗特加

顧念纔睟開元八年二月薨追封謚權窆於景龍觀天寶十三載
改葬京城南以祔其母敬陵舊唐書本傳

代宗諸子還選

均王退代宗第三子早夭貞元八年追封舊唐書本傳

荆王選代宗第十一子早世建中二年正月追封荆王贈開府儀

同三司舊唐書本傳

宗室本支百世之後天潢之派瓜縣椒衍其或功名自見可式諸宗則類紀於此又或文學武功貴不敵賢而非宗人所可囿者則別紀他類云

中山王後屈釐

劉屈釐武帝庶兄中山靖王子也不知其始所以進征和二年春
以涿郡太守屈釐為左丞相封澎侯秋與太子為江充所譖殺充

發兵入丞相府屈釐挺身逃亡其印綬上從甘泉來幸城西建章宮詔發三輔近縣兵以丞相兼將太子亦矯制發武庫兵毆四市人凡數萬衆至長樂西闕下逢丞相軍合戰五日太子軍敗南奔明年貳師將軍李廣利將兵擊匈奴丞相送至渭橋與廣利辭決廣利曰願早請昌邑王爲太子屈釐許諾昌邑王者貳師女弟李夫人子也貳師女爲屈釐子妻故共欲立焉時治巫蠱獄急內者令郭穰告丞相夫人以丞相數有譴使巫祠社祝詛主上有惡言及與貳師共禱祠欲令昌邑王爲帝有司奏請按驗罪至大逆不道有詔載屈釐廚車以狗要斬東市妻子梟首華陽街

漢書本傳

河間王後

輔

劉輔河間宗室也舉孝廉爲襄贛令上書言得失召見擢爲諫大夫會成帝欲立趙婕妤爲皇后先下詔封婕妤父臨爲列侯輔上

書言昔武王周公承順天地饗魚鳥之瑞然猶君臣祗懼動色相戒今廼觸情縱欲傾於卑賤之女欲以母天下惑莫大焉臣自念得以同姓拔擢不敢不盡死書奏上使侍御史收輔繫掖庭秘獄左將軍辛慶忌等俱上書言輔託公族之親在諫臣之列獨觸忌諱不足深過誠不宜幽囚於掖庭獄上廼徙繫輔共工獄減死罪一等論爲鬼薪終於家

漢書本傳

隋

華陰諸宗

整

嵩

子崇

整文帝次弟也與帝同生周明帝時以武元軍功賜爵陳留郡公從武帝平齊力戰而死文帝初居武元之憂率諸弟負土爲墳人植一栢四根鬱茂整栽者獨黃後大風雨并根失之果終不吉文

帝受禪追封謚焉

北史隋宗室諸王傳

文帝異母弟嵩在周以武元軍功賜爵興城公早卒文帝受禪追

封諡焉

北史隋宗室諸王傳

子崇武元帝族弟也少好學涉獵書記有風儀愛賢好士開皇初

拜儀同以車騎將軍恒典宿衛煬帝嗣位累遷候衛將軍從幸汾

陽宮子崇知突厥必為寇屢請早還京師不納尋有雁門之圍賊

退出為離石太守有能名突厥屢寇邊塞胡賊劉六兒復擁眾劫

掠郡境子崇請兵鎮遏帝大怒令子崇行長城子崇行百餘里四

面路絕不得進而歸太原兵起城中應之城陷為讐家所殺

北史隋宗

宗諸王傳

小鄭王房

勉

夷簡

宗閔

約

湯

勉字元卿鄭王元懿曾孫也幼勤經史長而沉雅清峻累授開封

尉至德初從至靈武拜監察御史屬朝廷右武大將管崇嗣於行
在朝堂背闕而坐勉劾之肅宗曰吾有李勉始知朝廷尊也累遷
山南西道觀察使故吏前密縣尉王晬勤幹俾攝南鄭令俄爲權
倖所誣勉飛表上聞遂獲宥歷江西觀察使賊帥陳莊陷江西州
縣勉悉平之部人有父病以蠱道爲木偶人署勉名姓瘞於隴或
以告曰爲父禳災亦可矜也捨之大曆二年拜京兆尹兼御史大
夫政尚簡肅宦官魚朝恩爲觀軍容使仍知國子監事前尹黎幹
寫心求媚每朝恩入監具數百人餼以待之及勉蒞職府吏先期
有請勉曰軍容使判國子監事勉候太學軍容宜厚具主禮勉忝
京尹軍容倘惠顧府廷豈敢不具蔬饌朝恩聞而銜之不復至四
年除廣州刺史兼嶺南節度觀察使番禺賊帥馮崇道桂州叛將
朱濟時等爲亂陷沒十餘州勉討斬之五嶺平在官累年器用車

服無增飾及代歸悉搜家人所貯犀象諸物投江中耆老以爲可
繼宋璟盧奐十年拜工部尚書滑毫永平軍節度使李忠臣鎮汴
州爲麾下所逐詔勉移汴州建中四年李希烈寇汴州勉城守累
月救援莫至遂潰圍南奔宋州詔以司徒平章事徵旣至優詔復
其位他日上謂勉曰人言盧杞奸邪朕何不知對曰天下皆知獨
陛下不知所以爲奸邪也時人多其正直然自是見疎貞元四年
卒贈賻有差勉坦率素淡好古尚奇清廉簡易爲宗臣之表

舊唐書本

傳

夷簡字易之鄭王元懿四世孫以宗室子補鄭丞德宗幸奉天朱
泚遣使東出關至華侯吏李翼不敢問夷簡曰泚必反向發函隴
兵五千救襄城乃賊舊部是將追還耳請驗之翼馳及潼關果得
符白於關大將駱元光乃斬賊使收僞符獻行在詔拜元光華州

刺史夷簡棄官去擢進士第遷累山南東道節度使初貞元時取
江西兵五百戍襄陽仰給度支後死亡略盡而歲取貲不置夷簡
奏罷之徙帥劔南召爲御史大夫進門下侍郎同中書門下平章
事久之請老以檢校左僕射分司東都明年卒夷簡致位顯處以
直自閑歷三鎮家無產貲世謂行已能有終始者

唐書本傳

夷簡諸弟

夷亮夷則夷範皆登進士第

舊唐書李
宗閔傳

宗閔字損之鄭王元懿四世孫擢進士調華州叅軍事舉賢良方
正與牛僧孺詆切時政宰相李吉甫惡之補洛陽尉去從藩府辟
署裴度伐蔡引爲彰義觀察判官蔡平遷駕部郎中知制誥穆宗
卽位進中書舍人長慶初錢徽典貢舉宗閔託所親於徽李德裕
等在翰林白徽取士不以實宗閔坐貶俄復爲中書舍人典貢舉
所取多知名士世謂之玉筍太和中以吏部侍郎同中書門下平

章事引僧孺同秉政德裕所善皆逐之遷中書侍郎久之德裕爲相宗閔大沮俄爲山南西道節度使李訓鄭注用事罷德裕復召宗閔會楊虞卿以京兆尹得罪極言營解帝怒貶潮州司戶叅軍事楊嗣復輔政與宗閔善謀引宗閔輔政未及而文宗崩會昌中以澤潞叛得交通狀流封州徙柳州司馬卒宗閔性機警始有當世令名旣貴喜權勢崇私黨卒以是敗子琨瓚皆擢進士瓚歷桂管觀察使不善御軍爲士卒所逐貶死

唐書本傳

約汧公勉之子也兵部員外郎雅度簡遠有山林之致在潤州得古鐵一片擊之清越又養一猿名山公月夜泛江登金山鼓琴猿必嘯和曾奉使行陝州硤石縣東愛渠水清流旬日忘發梁武造寺令蕭子雲飛白大書一蕭字約自江淮竭產致歸扁於小亭號

曰蕭齋

全唐詩話

湯宗閔弟宗冉之子也累官至給事中咸通中踐更臺閣知名於

時

舊唐書李
宗閔傳

湯累官京兆尹黃巢陷長安殺之

唐書李
宗閔傳

恒山王房

適之

季卿

載義

適之恒山愍王孫也始名昌神龍初擢左衛郎將開元中遷累通

州刺史以辦治聞按察使韓朝宗言諸朝擢秦州都督徙河南尹

政不苛細爲下所便元宗患穀洛歲暴耗徭力詔適之以禁錢作

三大防曰上陽積翠月陂自是水不能患進御史大夫二十七年

兼幽州長史知節度事適之以祖被廢父象見逐葬禮有闕至是

丐陪瘞昭陵闕中詔可遷刑部尚書天寶元年代牛仙客爲左相

與李林甫爭權不協於是皇甫惟明韋堅裴寬韓朝宗皆適之厚

善悉爲林甫所構得罪適之不自安乃求散職以太子少保罷俄

貶宜春太守會御史羅希奭陰被詔殺堅等貶所適之懼仰藥自

殺唐書
本傳

季卿適之子弱冠舉明經頗工文詞應制舉登博學宏詞科再遷
鄜縣尉肅宗朝累遷中書舍人以公事坐貶通州別駕代宗卽位
大舉淹抑徵爲京兆少尹尋拜吏部侍郎俄兼御史大夫奉使河
南江淮宣慰振拔幽滯進用忠廉時人稱之季卿有宇量性識博
達善與人交襟懷豁如其在朝以進賢爲務士以此多之大曆二
年卒孫融立性嚴整善吏事貞元十年官至渭州節度使卒

舊唐書李

載義字方穀常山愍王之後爲幽州屬郡守載義少孤有勇力善
挽強角觝劉濟爲幽州節度以功遷都知兵馬使寶曆中朱延嗣
竊襲父位不遵朝旨載義殺之數其罪以聞敬宗嘉之封武威郡
王充幽州節度副大使知節度事未幾李同捷據滄景邀襲父爵

載義上表請討同捷以自効累破賊軍太和三年平滄景策勲加平章事四年奚契丹寇邊擊走之就加太保五年爲部下楊志誠所逐因入覲改山南西道節度觀察等使兼興元尹七年遷北都留守充河東節度觀察處置等使迴鶻每遣使入朝所至強暴邊城長吏不敢制之以法但嚴兵防守至是有迴鶻將軍李暢者習中國事益驕恣鞭捶驛吏貪求無已載義因召李暢與語曰可汗使將軍朝貢朝廷饗餼至厚所以禮蕃客也苟有不至吏當坐死若將軍部伍不戢載義必殺爲盜者遂罷守兵使兩卒司其門虜無敢犯開成二年卒贈太尉

舊唐書本傳

吳王房

峴

峴吳王恪孫也長吏治天寶時累遷京兆尹元宗歲幸溫湯峴獨無所獻帝異之楊國忠使客擿安祿山陰事諷京兆捕其第得祿

山反狀祿山怒上書自言帝懼變出峴爲零陵太守峴爲政得人
心時京師米貴百姓相與謠曰欲粟賤追李峴尋徙長沙至德初
拜扶風太守兼御史大夫明年擢京兆尹封梁國公乾元二年以
中書侍郎同中書門下平章事於是呂諲李揆第五琦同輔政峴
位望最舊事多獨決諲等不平李輔國用權制詔不出中書百司
莫敢覆峴頓首帝前極言其惡帝悟稍加檢制輔國由是深銜峴
出爲蜀州刺史代宗立拜門下侍郎同中書門下平章事故事政
事堂不接客自元載爲相中人傳詔者置榻待之峴至卽勅吏撤
榻又奏常參官舉才任諫官憲官者無限員不踰月罷爲太子詹
事改檢校兵部尚書卒年五十八峴兄峘峘峴同時爲御史大
夫俱判臺事又合制封公峘爲戶部侍郎銀青光祿大夫同居長

興里第門列三戟

唐書本傳

曹王房

象古

道古

象古荆南節度使皋之子元和中自衡州刺史擢安南都護貪縱不法驩州刺史楊清者蠻酋也象古忌其豪召爲牙門將常鬱鬱思亂會討賊象古發甲助之授清兵三千清還襲安南殺象古并

其家

唐書曹王明傳

道古象古弟舉進士擢校書郎歷利隋唐睦四州刺史柳公綽鎮鄂岳爲飛譖上聞憲宗欲代之裴度言嗣曹王皋能以江漢兵制李希烈威惠在人今以其子將必有功會道古自黔中入朝乃代公綽元和十二年攻申州破其郭進圍中城守卒夜驅女子登而譟發懸門以出道古衆亂多死李聽守安州道古誣逐之自將出穆陵關士卒驕不能制又度支錢悉以饋權倖其下怨怒戰不力故再入申不能下淮西平召爲宗正卿左金吾將軍帝喜服餌道

古欲自媚而所善柳泌自謂能爲不死藥因宰相皇甫鎛以聞

帝崩穆宗立斥道古爲循州司馬終以服丹歐血死

唐書曹王明傳

蔣王芳

之芳

齊運

之芳蔡國公煌之孫也幼有令譽頗善五言詩宗室推之開元末爲駕部員外郎天寶十三載安祿山奏爲范陽司馬祿山起逆自拔歸西京授右司郎中歷太子右庶子廣德元年吐蕃犯邊遣之

芳兼御史大夫使吐蕃被留二年而歸除禮部尚書尋改太子賓客

舊唐書蔣王惲傳

齊運蔣王惲之孫也爲長安令職事修理歷京兆少尹建中末改河中尹李懷光自山東卷甲奔難至河中力疲休兵三日齊運傾力犒設軍人皆悅懷光旣反驅兵還保河中齊運不能敵棄城而走除京兆尹時賊據京城李晟軍東渭橋齊運徵募工役版築城

壘飛芻輓粟以應晟收復之際頗有力焉改宗正卿兼御史大夫
尋正拜禮部尚書兼殿中監齊運無學術不知大體但甘言取信
既而被疾歲餘不能朝請朝廷除授往往降中人就宅咨決卒贈

尚書左僕射

舊唐書
本傳

寧王房

景儉

景儉字寬中漢中王瑀之孫父褚太子中舍景儉貞元十五年進
士性俊朗博聞強記自負王霸之略於士大夫間無所屈累轉忠
州刺史元和末入朝時政惡之出爲澧州刺史延英辭日景儉自
陳已屈穆宗憐之拜倉部員外郎月餘驟遷諫議大夫性旣矜誕
寵擢之後凌蔑公卿大臣使酒尤甚中丞蕭俛學士段文昌相次
輔政訴之貶建州刺史未幾召還復爲諫議大夫其年十二月景
儉乘醉詣中書謁宰相呼王播崔植杜元穎名面疏其失辭頗悖

慢宰相遜言止之旋奏貶漳州刺史未至追還授少府少監竟不
得志而卒景儉疏財尚義雖不厲名節死之日知名之士咸惜之
景儉弟景儒景信景仁皆有藝學知名於時景信景仁皆登進士

第舊唐書
本傳

五言古詩
卷四
四



